

COLUMNA

«Suttamettai la terra»

JOST FALETT

L'uman sco curuna da la creaziun» – cun quella sabientscha ha l'umanitad vivì in pèr milli ons. La Bibla di en la Genesis (1,28) dad esser fritgaivels e sa multiplitgar – e da suttametter la terra. Quai avain nus fatg cun tala intensitad, che nosa terra ha cuntanschì oz plirs cunfins. Quai che il Club of Rome ha preannunzià il 1973 è succedì anc pli svelto co preditg. L'umanitad è arrivada ad in punct critic – ed igl è evident che uschia na pudain nus betg cuntinuar.

Is signals daventan adina pli frequents. Dumengia passada avain nus vuschà gist da trais tematicas che han gì la finamira da midar direcziun pertutgant l'utilisaziun da nosa terra. La lescha da CO₂ ha vulì frenar il stgaurament dal clima. Nos glatschers svaneschan, la schelira permanenta sdreglia e metta en moviment bovas, las setgiras s'augmentan e promovon fominas. Il cumbat per l'aua s'annunza ed en il futur daventan adina dapli terrens al nivel da la mar ed a l'ur dals deserts inhabitabels. Migraziuns da tut autra dimensiun che oz vegnan ad esser la consequenza. – Che il Grischun sco regiun muntagnarda che è confruntà adina puspè cun quellas consequenzas ha sbittà la lescha – ed ha decidì a curta vista per la bursa e betg a lunga vista per nos biadis – fa surstar. È il problem dal clima da schliar be sin nivel global? Cler: jau persunal-



main na poss midar zunt nagut vi dal clima mundial – quel argument sa mida dentant, sche tschient milliuns umans midan lur cumportament.

Er las iniciativas agraras han gì la finamira da midar direcziun. En Grischun n'eran quellas strusch necessarias, ma bain giu la Bassa. Aua da baiver tissientada, terrens agriculs cun pestizids sintetics che na sa schlian betg durant decennis, monoculturas monotonas senza insects. La diminuziun da la varietad biologica, spezialmain dals insects che segireschan la fructificaziun da las plantas – ed è il factur impurtant en la chadaina da nutriment – è alarmanta e forsa a lunga vista anc pli gravanta che il stgaurament dal clima. Sche ils insects mancan, patin nus vaira svelto fom.

Da l'idea, che l'uman stat sur la natira e sa dominar quella, stuain nus prender cumià. Er il pitschen virus da corona ha mussà che l'uman è ina spezia tranter autras e sut-

tamess a las leschas da la natira. Papa Franziscus ha en sia enciclica dal 2015 pledà per la midada ecologica che è pli che necessaria. Las baselgias han pruva da dar vita a l'idea dal mantegniment da la creaziun. En la politica ed economia dentant domineschan anc adina las forzas che vulan adina dapli e che crajan a la creschientscha infinita. Quella na datti betg en la natira – e nos mund na crescha betg.

L'idea da suttametter la terra ha funcziunà durant millis dad onns. En il temp da crap esi bain stà cler ch'igl era da far tut per survivor. L'uman sco il primat cun il pli grond success ha prendì en pussanza la terra. Oz vesain nus che Homo sapiens ha memia blier success e ch'el n'è betg pront da resguardar ils cunfins da la natira – en favur da las proximas generaziuns. Ils arguments per betg spetgar cun midar direcziun èn evidents. Gist la lescha da CO₂ a basava sin ina ferma argumentaziun scientifica, cun bleras cumprovas. L'istoricher e filosof *Philipp Blom* vegn ad avair raschun cun sia tesa, che l'uman n'emprenda betg tras arguments, mo be tras experientschas. E tar svilups irreversibels poi esser memia tard da spetgar sin las experientschas. Pli ditg che nus spetgain cun midar direcziun, e pli radicalas che las reacziuns da la natira vegnan ad esser.

Jost Falett, Bever, è stà durant blers onns scolast da biologia e rumantsch a l'Academia. Dasperas è el stà tranter auter president communal da Bever, president da la Lia Rumantscha.